



Broj/Број: 01/2a-50-1-2-38/09
Sarajevo/Сарајево, 19.2.2009.godine

ZAPISNIK

38. sjednice Komisije za vanjske poslove Predstavničkog doma Parlamentarne skupštine BiH, održane 17. 2. 2009.

Sjednica Komisije počela je u 11 sati. Sjednici su prisustvovali članovi Komisije: Slavko Matić, Milica Marković, Azra Alajbegović, Sefer Halilović i Denis Bećirović. Sjednici nisu prisustvovali Azra Hadžiahmetović, Milorad Živković, Husein Nanić i Sadik Ahmetović.

Osim članova Komisije, sjednici su prisustvovali i Biljana Čamur i Adnan Husić iz Ministarstva civilnih poslova BiH, Miroljub Krunić iz Ministarstva finansija i trezora BiH i Bakir Dautbašić i Ljubo Kuravica iz Ministarstva sigurnosti BiH.

Zapisnik su vodili Davorin Semenik, pivremeni sekretar Komisije za vanjske poslove, i Miroslav Stanišić, stručni saradnik u Komisiji za vanjske poslove.

Predsjedavajući Slavko Matić je na početku pozdravio prisutne članove Komisije za vanjske poslove i predstavnike Vijeća ministara BiH.

Za sjednicu Komisije jednoglasno je usvojen sljedeći

DNEVNI RED

1. Usvajanje Zapisnika 37. sjednice Komisije;
2. Davanje mišljenja o saglasnosti za ratifikaciju:
 - a) Sporazuma između Bosne i Hercegovine i Švicarske o readmisiji lica koja borave bez dozvole (resorno ministarstvo: Ministarstvo sigurnosti BiH);
 - b) Sporazuma između Bosne i Hercegovine i Švicarske o olakšicama kod izdavanja viza (resorno ministarstvo: Ministarstvo sigurnosti BiH);
 - c) Sporazuma između Vijeća ministara BiH i Vlade Crne Gore o vraćanju i prihvatanju lica čiji je ulazak ili boravak nezakonit i Protokola između Ministarstva sigurnosti BiH i Ministarstva unutrašnjih poslova i javne uprave Crne Gore o provođenju Sporazuma između Vijeća ministara BiH i Vlade Crne Gore o vraćanju i prihvatanju lica čiji je ulazak ili boravak bio nezakonit (resorno ministarstvo: Ministarstvo sigurnosti BiH);

- d) Sporazuma o zaštiti tajnih podataka između Vijeća ministara BiH i Vlade Slovačke Republike (resorno ministarstvo: Ministarstvo sigurnosti BiH);
 - e) Okvirne konvencije Svjetske zdravstvene organizacije o kontroli duhana (resorno ministarstvo: Ministarstvo civilnih poslova BiH);
 - f) Memoranduma o razumijevanju između Bosne i Hercegovine i Evropske zajednice o pridruživanju Bosne i Hercegovine Sedmom okvirnom programu Evropske zajednice za istraživanje, tehnološki razvoj i ogledne aktivnosti (resorno ministarstvo: Ministarstvo civilnih poslova BiH);
 - g) Sporazuma između Vijeće ministara BiH i Vlade Crne Gore o suradnji u oblasti kulture (resorno ministarstvo: Ministarstvo civilnih poslova BiH);
 - h) Sporazuma o zajmu između Bosne i Hercegovine i Evropske banke za obnovu i razvoj – *Projekat Koridor Vc* (resorno ministarstvo: Ministarstvo finansija i trezora BiH);
 - i) Sporazuma između Vijeća ministara BiH, koje predstavlja Ministarstvo finansija i trezora BiH, i Vlade Republike Austrije, koju predstavlja savezni ministar finansija o finansijskoj saradnji (resorno ministarstvo: Ministarstvo finansija i trezora BiH);
3. Usvajanje Izvještaja o radu Komisije za vanjske poslove u 2008. godini;
 4. Usvajanje Orijentacionog radnog plana Komisije za vanjske poslove u 2009. godini;
 5. Materijali pristigli na Komisiju – za informaciju:
 - Rezolucija Parlamenta Malezije o napadima Izraela na palestinski pojas Gaze;
 - Zabilješka sa sastanka članova kolegija oba doma PSBiH s N.J.E. Abdelom Hadijem Majalijem, predsjednikom Predstavničkog doma Hašemitske Kraljevine Jordan;
 - Izvještaj o uzvratnoj posjeti Komisije za vanjske poslove PDPSBiH Odboru za vanjsku politiku Hrvatskog sabora, 1. i 2. 12. 2008.;
 - Zabilješka o prijemu novoimenovanih ambasadora BiH u Vašingtonu, Budimpešti i Sofiji, te generalnog konzula u Milanu, 20.1.2009.;
 - Izvještaj o službenoj posjeti članova Grupe prijateljstva PSBiH Republici Turskoj;
 - Rezolucija o Srebrenici, sjednica Evropskog parlamenta, Strazbur, 14. i 15. 1. 2009. (materijal MVP-a BiH);
 - Informacija o izboru člana Koordinacionog tima za izbor BiH za nestalnu članicu Vijeća sigurnosti UN-a za 2010. godinu ;
 - Okvirni plan međunarodnih aktivnosti PSBiH za 2009. godinu, s kriterijima o načinu njegovog provođenja;
 - Izvještaj o 11. interparlamentarnom sastanku delegacije Parlamentarne skupštine BiH i Evropskog parlamenta, Brisel, 21. i 22. 1. 2009. (materijal MVPBiH);
 - Izvještaj o aktivnostima delegacije PSBiH pri PS Centralnoevropske inicijative u 2008. godini;
 - Izvještaj o održavanju političkih konsultacija između Ministarstva vanjskih poslova BiH i Islamske Republike Iran u Teheranu od 15. do 19. 11. 2008. (materijal MVPBiH);
 - Održavanje okruglog stola o poboljšanju vojno-političkih obaveza BiH u okviru UN-a i OSCE-a, Sarajevo, 11. i 12. 3. 2009.;
 - Dogovor o terminu i sastavu delegacije Komisije za vanjske poslove za uzvratnu posjetu parlamentima Švicarske i Estonije;
 6. Tekuća pitanja.

Ad.1. Usvajanje Zapisnika 37. sjednice Komisije

Nije bilo primjedbi i članovi Komisije jednoglasno su usvojili Zapisnik 37. sjednice Komisije za vanjske poslove.

Ad. 2. a) Davanje mišljenja o saglasnosti za ratifikaciju Sporazuma između Bosne i Hercegovine i Švicarske o readmisiji lica koja borave bez dozvole

b) Davanje mišljenja o saglasnosti za ratifikaciji Sporazuma između Bosne i Hercegovine i Švicarske o olakšicama kod izdavanja viza

c) Davanje mišljenja o saglasnosti za ratifikaciji Sporazuma između Vijeća ministara BiH i Vlade Crne Gore o vraćanju i prihvaćanju lica čiji je ulazak ili boravak nezakonit i Protokola između Ministarstva sigurnosti BiH i Ministarstva unutrašnjih poslova i javne uprave Crne Gore o provođenju Sporazuma između Vijeća ministara BiH i Vlade Crne Gore o vraćanju i prihvaćanju lica čiji je ulazak ili boravak bio nezakonit

d) Davanje mišljenja o saglasnosti za ratifikaciju Sporazuma o zaštiti tajnih podataka između Vijeća ministara BiH i Vlade Slovačke Republike

Predsjedavajući Slavko Matić zamolio je predstavnika resornog ministarstva da ukratko iznese osnovne napomene u vezi sa sva četiri sporazuma.

Bakir Dautbašić iz Ministarstva sigurnosti BiH kazao je da je bio šef pregovaračkog tima za prva tri sporazuma i da će biti izvijestilac za četvrti sporazum.

On je kazao da Švicarska nije članica Evropske unije tako da se ugovor o readmisiji s Evropskom unijom ne odnosi na Švicarsku. Kao bitnu činjenicu naveo je da je Švicarska oko Nove godine postala potpisnica šengenskog sporazuma tako da je malo ubrzano potpisivanje ovog ugovora, kako se to radi i sa ostalim evropskim zemljama. Pregovori su završeni i Ugovor je parafiran na prvoj rundi pregovora. Nakon toga ministar sigurnosti BiH potpisao je Sporazum i on je išao u paketu sa Sporazumom o viznim olakšicama. Dodao je da je Sporazum o viznim olakšicama treći koji je BiH potpisala, nakon potpisivanja s Norveškom i Danskom. Ugovor o viznim olakšicama sa Švicarskom veoma je sličan ugovoru s Evropskom unijom. Bitna je okolnost da, nakon što je Švicarska postala članica šengenskog sporazuma, neće više biti potrebno vaditi vize posebno za Švicarsku.

Kada je u pitanju Sporazum sa Crnom Gorom o readmisiji lica, naša država ima veći interes nego druge države, jer, kad gledamo imigracione tokove, proteklih godina najveće probleme imali smo s imigrantima koji dolaze s teritorije Albanije i Kosova, koji su najčešći tranzit imali preko Crne Gore. Ovim sporazumom sa Crnom Gorom dogovoreno je da se ti imigranti vraćaju na već označenim graničnim prijelazima prema evropskim standardima koje poštuju i Bosna i Hercegovina i Crna Gora. Dodao je da BiH već tri godine pokušava da sklopi Ugovor o readmisiji s Albanijom ali da to ide teško jer je albanska strana svjesna da bi u 99% slučajeva misija išla u jednom smjeru iz Bosne i Hercegovine ka Albaniji ali to nas čeka sa svim zemljama odakle dolaze ilegalni imigranti ka Bosni i Hercegovini. Takva je situacija i s Turskom, Moldavijom i Ukrajinom.

U vezi sa Sporazumom o zaštiti tajnih podataka između Vijeća ministara BiH i Vlade Slovačke Republike, kazao je da će ovo biti prvi ratificirani Sporazum o zaštiti tajnih podataka između BiH i jedne od država članica Evropske unije. On je kazao da ćemo morati uspostaviti kurirske službe koje će motornim vozilima nekada biti u situaciji da razmjenjuju tajne podatke. S obzirom da Austrija i Švicarska nisu članice NATO-a, kroz te zemlje neće se moći tranzitirati s tajnim podacima, tako da će se morati ići okolo preko Francuske ili preko Mađarske i Slovačke. Nama će

Slovačka biti međustanica gdje ćemo imati osiguran nesmetan boravak, prenoćište ako je potrebno, sigurnost vozila i pošte koju to vozilo nosi. Također je dogovoreno sa slovačkim predstavnicima da u specifičnim situacijama kurirska služba Slovačke donosi do Bratislave i našu poštu odakle bismo je mi dalje tranzitirali prema Sarajevu. Dodao je da se u vezi sa istim Sporazumom o zaštiti tajnih podataka pregovara s još nekim zemljama kao što su Slovenija, Češka i Mađarska.

Slavko Matić pitao je u kojoj su fazi prva dva sporazuma o readmisiji lica koja borave bez dozvole i viznim olakšicama kad su u pitanju zemlje koje nisu članice Evropske unije.

Bakir Dautbašić kazao je da su ugovori potpisani sa Švicarskom, Danskom i Norveškom. Što se tiče Danske i Norveške, ugovori su već prošli ratifikaciju. Dodao je da smo od Velike Britanije i Irske dobili informaciju da oni nisu zainteresirani za bilateralno potpisivanje ugovora o viznim olakšicama i to je zvaničan stav tih država. Kada su u pitanju Island i Lihtenštajn, mi smo stupili u kontakt s vladama tih zemalja gdje postoje problemi jer je na Islandu pala vlada i čeka se da se situacija kod njih konsolidira, a što se tiče Lihtenštajna postoje prilično bizarni problemi jer su oni uvijek na neki način pratili bilateralne sporazume sa Švicarskom. Međutim, pošto je Švicarska ušla među zemlje Šengena, ovaj ugovor ne može važiti za Lihtenštajn. On je kazao da je na konferenciji u Kijevu stupio u kontakt sa šeficom viznog odjela iz Lihtenštajna i uručio joj prijedlog ovog sporazuma i sada čekamo zvaničan odgovor.

Denis Bećirović pitao je šta je sadržaj tih viznih olakšica.

Bakir Dautbašić kazao je da je sadržaj apsolutno isti kao i Ugovoru s Evropskom unijom, što znači 20 kategorija stanovništva plus one olakšice koje se odnose na nosioce diplomatskih pasoša. Viza se produžava svaki put na osnovu nove aplikacije na tri, šest, dvanaest i više mjeseci. U biti, sličnost s Ugovorom s Evropskom unijom je 90%.

Sefer Halilović pitao je na koja se lica odnosi Ugovor sa Crnom Gorom.

Bakir Dautbašić rekao je da se Ugovor odnosi na sve državljane Crne Gore, Bosne i Hercegovine i trećih zemalja koji su u ilegalnom tranzitu kroz BiH ili Crnu Goru. On je kazao da su najveći problem ilegalni imigranti iz Albanije koji kroz Crnu Goru tranzitiraju u BiH i dalje u Hrvatsku. Mi po ugovoru o readmisiji s Republikom Hrvatskom moramo bezuslovno primiti lice koje je tranzitiralo kroz BiH, ali smo sada u situaciji da Republika Crna Gora mora bezuslovno primiti državljane treće zemlje, znači isto tako vraćamo te državljane bez potrebe da ih zadržavamo u našem imigracionom centru.

Nakon toga, članovi Komisije jednoglasno su dali pozitivno mišljenje Predstavničkom domu u vezi s ratifikacijom ova četiri sporazuma.

e) Davanje mišljenja o saglasnosti za ratifikaciju Okvirne konvencije Svjetske zdravstvene organizacije o kontroli duhana

Adnan Husić iz Ministarstva civilnih poslova BiH rekao je da je Okvirna konvencija Svjetske zdravstvene organizacije o kontroli duhana sporazum koji je zasnovan na dokazima kojim se reafirmiraju prava svih ljudi. To je prvi međunarodni dogovor o kontroli duhana urađen pod pokroviteljstvom Svjetske zdravstvene organizacije u čijoj izradi su aktivno učestvovali predstavnici 192 zemlje, među kojima i Bosna i Hercegovina. Sama konvencija je dokument kojim se globalno predstavljaju novi trendovi. Potpisnici ove konvencije odlučni su da rade više na pravu zaštite javnog zdravlja. Odredbama dokumenta obuhvaćene su odredbe kontrole duhana koje od zemalja članica zahtijevaju harmonizaciju nacionalnih zakonodavstava u smislu sveobuhvatne

zabrane reklamiranja, promocije i sponzoriranja od strane duhanske industrije, zabrane upotrebe termina "light" i "ultra light", zaštita građana od izloženosti duhanskom dima na radnim mjestima, u sredstvima javnog prijevoza i javnim mjestima. Konvenciju je do danas potpisalo 168 zemalja. S obzirom da širenje same duhanske epidemije predstavlja globalni problem s teškim posljedicama po javno zdravlje, njegovo rješavanje zahtijeva najširu moguću međunarodnu saradnju i učešće svih zemalja. Bosna i Hercegovina odlučna je da prati takve trendove i pristupi ovoj konvenciji. Predsjedništvo BiH je na 44. sjednici donijelo odluku o pristupanju BiH Okvirnoj konvenciji Svjetske zdravstvene organizacije o kontroli duhana i ovlastilo Sredoja Novića, ministra civilnih poslova BiH, da potpiše ovu konvenciju.

Azra Alajbegović pitala je šta će se dogoditi poslije, s obzirom da nemamo jedinstveno zdravstvo na nivou države, nemamo koncept promocije zdravlja i prevencije masovnih bolesti i ovisnosti.

Adnan Husić kazao je da ćemo, kada ratificiramo taj dokument, biti u obavezi svoje nacionalno zakonodavstvo uskladiti s tom konvencijom kao i da poštujemo odredbe te konvencije.

Nakon toga članovi Komisije jednoglasno su dali pozitivno mišljenje Predstavničkom domu u vezi s ratifikacijom Okvirne konvencije Svjetske zdravstvene organizacije o kontroli duhana.

f) Davanje mišljenja o saglasnosti za ratifikaciju Memoranduma o razumijevanju između Bosne i Hercegovine i Evropske zajednice o pridruživanju Bosne i Hercegovine Sedmom okvirnom programu Evropske zajednice za istraživanje, tehnološki razvoj i ogledne aktivnosti

Biljana Čamur iz Ministarstva civilnih poslova BiH upoznala je Komisiju sa osnovnim detaljima ovog memoranduma i kazala da BiH njegovom ratifikacijom pokazuje interes da postane dio evropskog istraživačkog prostora. Prihvatanjem ovog memoranduma omogućava se veće učešće naših istraživača u ovoj oblasti zajedno s partnerima istraživačima iz Evropske unije. Ona je na pitanje Azre Alajbegović odgovorila da istraživači iz BiH nakon ratifikacije ovog memoranduma mogu biti i nosioci projekata a ne samo partneri.

Članovi Komisije su nakon toga jednoglasno dali pozitivno mišljenje Predstavničkom domu u vezi s ratifikacijom ovog memoranduma.

g) Davanje mišljenja o saglasnosti za ratifikaciju Sporazuma između Vijeća ministara BiH i Vlade Crne Gore o saradnji u oblasti kulture

Sporazum između BiH i Crne Gore ima za cilj unapređenje bilateralne saradnje i on omogućava unapređenje saradnje kulturnih institucija između dvije zemlje. U njemu se preporučuje da i u okviru UNESCO-a, Vijeća Evrope i drugih međunarodnih organizacija dvije zemlje sarađuju i zajedno nastupaju. Ovaj sporazum omogućava da nakon njegovog stupanja na snagu dvije zemlje pokrenu listu konkretnih programa saradnje za pojedinačne oblasti kulture.

Nije bilo rasprave. Članovi Komisije jednoglasno su dali pozitivno mišljenje Predstavničkom domu u vezi s ratifikacijom ovog sporazuma.

h) Davanje mišljenja o saglasnosti za ratifikaciju Sporazuma o zajmu između Bosne i Hercegovine i Evropske banke za obnovu i razvoj – Projekat Koridor Vc

Miroljub Krunic iz Ministarstva finansija i trezora BiH kazao je da se Sporazum o zajmu između BiH i Evropske banke odnosi na 66 km autoputa u dijelu Federacije BiH i finansira se po standardnim uslovima koje nudi Evropska banka za obnovu i razvoj. Vrijednost ovog posla je 180

miliona eura, kamatna stopa je 1%, vrijeme otplate je 15,5 godina sa 4,5 godine grejs perioda. Ovaj sporazum praktično znači kofinansiranje paralelno s Evropskom investicionom bankom. Jedan dio tog aranžmana već je zaključen a preostali dio vjerovatno će biti zaključen tokom ove godine. Time bi bili stvoreni preduslovi da se dionica Autoputa na Koridoru Vc, koja prolazi kroz Federaciju BiH, uz sve ono što je do sada uloženo i urađeno na ovom koridoru, realizira u cjelini korištenjem koncesionog ugovora koji bi bio u međuvremenu pripremljen, a odnosio bi se na izgradnju preostalog dijela. Ovaj projekat je specifičan zato što predviđa uvođenje akcize od 5, odnosno 10 feninga po litri goriva i djelovanje ovog sporazuma zavisi od ovog uslova.

Slavko Matić pitao je kada će ova sredstva biti operativna.

Miroljub Krunic kazao je da je predviđeno da se po sticanju uslova za efektivnost sav novac potroši do 2012. godine što zavisi od toga kad će biti završen proces ratifikacije. Izrazio je očekivanje da će sredstva biti operativna do aprila ove godine.

Azra Alajbegović pitala je na koje dijelove dionice Autoputa se odnose ta sredstva.

Miroljub Krunic rekao je da se radi o dionicama Kakanj – Drivuša, Vlakovo – Tarčin, Počitelj – južna granica i Odžak – sjeverna granica.

Nakon toga, članovi Komisije jednoglasno su dali pozitivno mišljenje Predstavničkom domu u vezi s ratifikacijom ovog sporazuma.

i) Davanje mišljenja o saglasnosti za ratifikaciju Sporazuma između Vijeća ministara BiH, koje predstavlja Ministarstvo finansija i trezora BiH, i Vlade Republike Austrije, koju predstavlja savezni ministar finansija, o finansijskoj saradnji

Miroljub Krunic je u vezi s ovim sporazumom kazao da BiH s Republikom Austrijom ima zaključen Okviri sporazum iz 2006. godine i ovaj amandman je njegova promjena. Osnovnim sporazumom dozvoljeno je finansiranje odgovarajućih projekata u BiH po koncesionalnim uslovima, što znači da su svi ti aranžmani sadržavali minimalno 35% grant elemenata i predstavljao je jedan relativno povoljan izvor finansiranja za projekte u BiH. Pošto su ta sredstva iscrpljena, došlo se u situaciju da projekte da ih nismo mogli finansirati bez ovog dodatka. Projekti u Laktašima, Srpcu, Zenici i Kiseljaku **praktično će biti popunjeni finansijski**, ako se dođe do **efektivnosti Sporazuma iz ovih izvora**. Amandman obuhvata dodatnih 50 miliona eura za finansiranje pod veoma povoljnim uslovima za BiH.

Slavko Matić pitao je ko je u ovom slučaju obveznik povratka sredstava.

Miroljub Krunic kazao je da se svi poslovi zaključuju između krajnjeg korisnika i kreditora ali podrazumijevaju suverenost plaćanja. Dosad se to radilo kroz direktno zaduživanje i prenošenje te obaveze do krajnjeg korisnika preko entiteta. Sve obaveze plaća Bosna i Hercegovina ali **krajnji platilac** je korisnik svakog pojedinačnog projekta.

Nakon toga, članovi Komisije jednoglasno su dali pozitivno mišljenje Predstavničkom domu u vezi s ratifikacijom ovog sporazuma.

Ad. 3. Usvajanje Izvještaja o radu Komisije za vanjske poslove u 2008. godini

Nije bilo rasprave i Komisija je jednoglasno usvojila Izvještaj o radu Komisije za 2008. godinu.

Ad. 4. Usvajanje Orijentacionog radnog plana Komisije za vanjske poslove u 2009. godini

Slavko Matić pozvao je članove Komisije da daju svoje prijedloge, dopune ili izmjene u vezi s Orijentacionim radnim planom za 2009. godinu. ili da daju primjedbe ako ih imaju i kazao da se može ostaviti vremena do naredne sjednice Komisije za sve prijedloge.

Milica Marković kazala je da je ovako **mali orijentacioni** plan nedopustiv za Komisiju koja ima značajnu ulogu u Parlamentarnoj skupštini BiH. U tom kontekstu, podržala je prijedlog Slavka Matića da se o ovome danas ne izjašnjavamo nego da ovo bude polazni materijal, a da za sljedeću sjednicu svaki član Komisije pripremi svoje prijedloge za program rada. Kazala je da bi bilo dobro da se Komisija u 2009. godini više fokusira na aktivnosti koje su vezane za evroatlantske integracije, kao i da se pozovu komisije za vanjske poslove iz zemalja koje su okončale proces integracija ili u njemu odmakle, iz kojih bi se mogle dobiti korisne informacije i sugestije. Predložila je da za sljedeću sjednicu Komisije svaki član Komisije predloži u pisanoj formi svoje prijedloge ili sugestije o radu Komisije za 2009. godinu.

U vezi s ovim, Komisija je donijela zaključak da članovi Komisije do naredne sjednice u pisanoj formi dostave svoje prijedloge ili primjedbe za dopunu i obogaćivanje Orijentacionog radnog plana, o kojima bi raspravljali na narednoj sjednici i eventualno ih unijeli u radni plan za 2009. godinu.

Ad. 5. Materijali pristigli na Komisiju – za informaciju:

- Rezolucija Parlamenta Malezije o napadima Izraela na palestinski Pojas Gaze;
- Zabilješka sa sastanka članova kolegija oba doma PSBiH s N.J.E. Abdelom Hadijem Majalijem, predsjednikom Predstavničkog doma Hašemitske Kraljevine Jordan;
- Izvještaj o uzvratnoj posjeti Komisije za vanjske poslove PDPSBiH Odboru za vanjsku politiku Hrvatskog sabora, 1. i 2. 12. 2008.;
- Zabilješka o prijemu novoimenovanih ambasadora BiH u Vašingtonu, Budimpešti i Sofiji, te generalnog konzula u Milanu, 20.1.2009.;
- Izvještaj o službenom posjetu članova Grupe prijateljstva PSBiH Republici Turskoj;
- Rezolucija o Srebrenici, sjednica Evropskog parlamenta, Strazbur, 14. i 15. januar 2009. (materijal MVPBiH);
- Informacija o izboru člana Koordinacionog tima za izbor BiH za nestalnu članicu Vijeća sigurnosti UN-a za 2010. godinu ;
- Okvirni plan međunarodnih aktivnosti PSBiH za 2009. godinu, s kriterijima o načinu njegovog provođenja;
- Izvještaj o 11. interparlamentarnom sastanku delegacije Parlamentarne skupštine BiH i Evropskog parlamenta, Brisel, 21. i 22. 1. 2009. (materijal MVPBiH);
- Izvještaj o aktivnostima delegacije PSBiH pri PS Centralnoevropske inicijative u 2008. godini;
- Izvještaj o održavanju političkih konsultacija između Ministarstva vanjskih poslova BiH i Islamske Republike Iran u Teheranu od 15. do 19. novembra 2008., (materijal MVPBiH);
- Održavanje okruglog stola o poboljšanju vojno-političkih obaveza BiH u okviru UN-a i OSCE-a, Sarajevo, 11. i 12. 3. 2009.;

- **Dogovor o terminu i sastavu delegacije Komisije za vanjske poslove za uzvratnu posjetu Parlamentu Švicarske i Estonije**

Denis Bećirović pitao je šta se očekuje od Komisije za vanjske poslove kada su u pitanju informacije i izvještaji iz tačke 5. dnevnog reda i zatražio da se oni, ako se očekuje da se prime k znanju, više ne stavljaju na dnevni red.

U vezi s rezolucijom Evropskog parlamenta o Srebrenici, Denis Bećirović predložio je da Komisija za vanjske poslove predloži Predstavničkom domu da ovo bude tačka dnevnog reda na narednoj sjednici Predstavničkog doma.

Komisija je, sa četiri glasa "za" i jednim "suzdržanim", usvojila zaključak da Komisija za vanjske poslove predlaže Predstavničkom domu da u dnevni red naredne sjednice uvrsti, kao posebnu tačku, Rezoluciju o Srebrenici koju je usvojio Evropski parlamenta u Strazburu, 14. i 15. 1. 2009.

Komisija je primila k znanju informacije i izvještaje iz ove tačke dnevnog reda.

Davorin Semenik upoznao je Komisiju s ponuđenim terminima za posjetu Komisije za vanjske poslove Parlamenta Estonije, kao i da od švicarske strane još nismo obaviješteni o eventualnom terminu posjete Parlamentu Švicarske.

Zaključeno je da se sugerira estonskoj strani da se termin posjete pomjeri kako se ne bi podudarilo sa datumom održavanja sjednica Predstavničkog doma PSBiH.

Slavko Matić se na kraju zahvalio članovima Komisije.

Sjednica je završena u 12 sati.

Zapisnik sačinio:

Miroslav Stanišić, stručni saradnik u Komisiji za vanjske poslove.

Sekretar Komisije

Merdžana Iglica

Predsjedavajući

Slavko Matić

Kopija MVP-u BiH